

Bicol - Espiritwal Makalaban Kasuratan - SW Intro Scriptures

Lukas 17:5 Nagsabi sa Kaguranganan an mga apostol, “Pakosoga an samong pagtubod!”

Roma 10:17 Kaya an pagtubod bunga kan pagdangog sa mensahe; an mensahe bunga kan paghulit dapit ki Cristo.

Lukas 11:1 Sarong aldaw, namimibi si Jesus sa sarong lugar. Pakatapos niya, sinabihan siya kan saro kan saiyang mga disipulo, “Kaguranganan, tukdoe man kaming mamibi, arog ki Juan na nagtukdo sa saiyang mga disipulo.”

1 Timoteo 2:1-4 Kaya enot sa gabos, nagsasadol ako na an mga paghagad, mga pamibi, mga pakimaherak, saka mga pasalamat kaipuhan idolot para sa gabos na tawo, 2 para sa mga hade asin sa iba pang mga awtoridad, tanganing mamuhay kitang matiwasy, matoninong, magalang sa Dios asin ginagalangan. 3 Marahay iyan asin nakakapaogma sa Dios na satong Paraligtas, 4 na nagmamawot na an gabos makaligtas, saka makamidbid kan katotoohan.

Zacarias 3:1,2 Sa saro pang bisyon ipinahiling sako nin Kaguranganan an Halangkaw na Padi na si Josue na nagtitindog sa atubangan kan anghel nin Kaguranganan. Yaon sa kataed ni Josue si Satanas, na andam sa pagreklemo tumang ki Josue. 2 Sinabihan kan anghel nin Kaguranganan si Satanas, “Kondenaron ka logod nin Kaguranganan, Satanas! Kondenaron ka logod nin Kaguranganan na namomoot sa Jerusalem. An lalaking ini nakakaarog sa sarong sanga na inagaw sa kalayo.”

Efeso 6:12 Bakong mga tawo an satong kaiwal, kundi an mga prinsipado, mga kapangyarihan, mga kagsakop kan kadikloman ngunyan sa kinaban, mga hukbo nin mga maraot na espiritu sa kalangitan.

Efeso 6:10,11 Sa kataposan, magin makosog kamo sa pakisumaro sa Kaguranganan, sa kosog kan saiyang kapangyarihan. 11 Gamiton nindo an gabos na armas na itinatao saido nin Dios, tanganing makaya nindong labanan an mga katusohan kan Diablo.

Efeso 6:13-17 Kaya isulot nindo an mga armas nin Dios, tanganing makatagal kamo kun umabot na an maraot na aldaw, asin pakatapos kan saindong pakilaban, pusog pa giraray kamo. 14 Kaya magin andam kamo! Ihagkos nindo sa habayan an katotoohan, saka itahob nindo sa saindong daghan an katanosan. 15 Isapatos nindo an pagigin andam para sa paghulit kan Marahay na Bareta nin katoninongan. 16 Sa gabos na oras, daraha nindo an pagtubod bilang kalasag, tanganing masigbo an mga nagkakalayong pana kan Maraot. 17 Ikalo nindo an kaligtasan bilang helmet, saka kapotan an tataramon nin Dios bilang espada na itinatao saido kan Espiritu.

Hebreyo 4:12 An tataramon nin Dios buhay saka mapangyari, mas matarom ki kan arin man na espada na doble an tarom. Minalagbas iyan sa sugponan kan kalag saka espiritu, sa sugponan kan ngalongaloan saka hutok nin

tolang. Naaaraman kaiyan an kaisipan asin kamawotan nin tawo.

Lukas 4:8 Nagsimbag si Jesus, “Nasusurat, ‘Sambahon mo an Kagurangan mong Dios asin siya sana an saimong paglingkodan!’”

Efeso 6:18 Dayaday kamong mamibi asin maghagad nin tabang sa Dios sa paagi kan Espiritu Santo. Huli kaini danay kamong magbantay; mamibi kamo para sa mga banal.

1 Samuel 17:45-47 Nagsimbag si David, “Nagdigdi ka sako na may espada, garod asin kalasag, alagad nagdigdi ako saimo sa ngaran nin Kagurangan, an Dios kan mga hukbo nin Israel, na saimong tinumangan. 46 Ngunyan man sanang aldaw, itatao ka nin Kagurangan sa sakong kamot; dadaogon taka asin pupugoton ko an saimong payo. Itatao ko sa mga gamgam asin sa mga hayop an mga bangkay kan mga Filisteong soldados. Dangan maaaraman kan bilog na daga na igwa nin sarong Dios an Israel. 47 Mahihiling kan gabos na uya digdi na nagliligtas an Kagurangan bako sa paagi nin espada o garod. Mapanggana siya sa gera, asin ibubugtak niya kamo gabos sa samong mga kamot.”

Lukas 10:17-20 Maogmang nagbalik an setenta y dos asin nagsabi, “Kagurangan, dawa an mga demonyo nagkuyog samo kan pagbotan mi sinda sa ngaran mo!” 18 Sinabihan sinda ni Jesus, “Nahiling ko si Satanas na nahulog na garo kikilat hale sa langit. 19 Tinawan ko kamo nin kapangyarihan sa pagbatay sa mga halas saka sa mga uyang asin sa pagdaog kan gabos na kaiwal, kaya dai kamo maaano. 20 Alagad mag-ogma kamo bakong huli ta nagkukuyog saindo an mga maraot na espiritu kundi huli ta nasusurat sa langit an saindong mga ngaran.”

2 Corinto 10:3-5 Totoo na nabubuhay kami digdi sa kinaban, alagad dai kami nakikipaglaban dahel sa kinabanon na katuyohan. 4 An mga armas na ginagamit mi sa pakilaban bakong mga armas kan kinaban, kundi mga mapangyaring armas nin Dios, na ginagamit mi sa pagrumpag nin mga bantayan. 5 Rinurumpag mi an mga putik na argumento; ginagaba mi an lambang kapaabaw-abawan na nakakaolang sa pakamidbid sa Dios; binibihag mi an gabos na pag-isip tanganing magkuyog ki Cristo.

2 Timoteo 1:7 Huli ta an Espiritu na itinao sato nin Dios bakong nagpatalaw sato kundi pinapano kita nin kapangyarihan, pagkamoot asin pagpugol sa sadiri.

Mateo 12:28,29 Alagad kun nagpapaluwas ako nin mga demonyo sa kapangyarihan kan Espiritu nin Dios, nagpapatotoo ini na nagpoon na an Kahadean nin Dios saindo. 29 “Mayong makakasalakat sa harong nin sarong makosog na tawo kun dai ngona niya gaposon ini. Kun magapos na ini, saka pa sana niya masasamsaman an harong.

Efeso 1:13 Kamo man nagin banwaan nin Dios kan maaraman nindo an Marahay na Bareta na nagdara nin kaligtasan saindo. Nagtubod kamo ki Cristo, kaya ipinadara saindo an Espiritu Santo na ipinanuga niya bilang tanda na sadiri na kamo nin Dios.

Gibo 19:6 Idinuta ni Pablo an saiyang mga kamot sainda, asin naghilig sainda an Espiritu Santo. Nagtaram sinda sa manlaen-laen na lengwahe saka nagrukyaw kan tataramon nin Dios.

Markos 16:15-18 Sinabihan niya sinda, “Paduman kamo sa bilog na kinaban; ihulit nindo an Marahay na Bareta sa gabos na tawo. 16 An magtubod saka mabunyagan, makakaligtas; an dai magtubod, kokondenaron. 17 An mga nagtutubod magkakaigwa kan mga tandang ini: sa ngaran ko magpapaluwas sinda nin mga demonyo; magtataram sinda nin manlaen-laen na lengwahe; 18 kun magkapot sinda nin halas, o kun mag-inom nin hilo, dai sinda maaano; an mga naghehelang na kapotan ninda, maoomayan.”

1 Juan 1:9 Alagad kun ikumpisal ta sa Dios an satong mga kasalan, lilinigan niya kita saka papatawadon; lilinigan kita kan gabos tang kasalan, huli ta maimbod siya asin matanos.

Exodo 20:5 Dai kamo magduko sa mga dios-dios o magsamba sa sainda, huli ta ako an Kagurangnan na saindong Dios, sarong maimon na Dios. Pinapadusahan ko an mga naoongis sako pati an saindang mga aki sagkod sa ikatolo saka sa ikaapat na henerasyon.

Salmo 109:17 Nawili siyang magmaldisyon; maldisyonon logod siya! Habo siya nin bendisyon; magharayo logod ini saiya!

Hukom 16:16 Dangan inoro-aldaan ni Delila an paghapot asin pagpirit ki Samson. Nauyam si Samson sa kapipirit ni Delila,

Efeso 4:26 Kun maanggot kamo, likayan nindo na magkasala; dai nindo pasolnopon an aldaan na dai pa nahale an saindong kaanggotan.

Roma 14:12 Kaya an lambang saro sato matao nin kwenta kan sadiri niyang buhay sa Dios.

1 Juan 2:23 Huli ta an siisay man na nagnenegar sa Aki, nagnenegar man sa Ama; an minaako sa Aki, minaako man sa Ama.

Juan 14:6 Sinimbag siya ni Jesus, “Ako an dalan, an katotoohan asin an buhay; dai nin makakaduman sa Ama, kun bakong huli sako.

Mateo 11:28-30 “Madya kamo sako, kamo gabos na napapagal asin nagagabatan, ta tatawan ko kamo nin kapahingaloan. 29 Salongan nindo an sakong sakal asin mag-adal kamo sako, huli ta ako maboot asin mahuyo; asin makakakua kamo nin kapahingaloan. 30 Huli ta masayon an sakuyang sakal asin magian an pasanon ko.”

2 Corinto 6:2 An Dios nagsasabi: “Dinangog taka sa tamang panahon, tinabangan taka sa aldaan nin kaligtasan.” Maghinanyog kamo! Ngunyan an tamang panahon; ngunyan an aldaan nin kaligtasan!

Roma 10:13 Siring sa nasasabi sa kasuratan, “An gabos na nag-aapod sa ngaran nin Kagurangnan, makakaligtas.”

Pastor T. John Franklin

Church of Salvation, Healing, and Deliverance

COS-HAD.org